



partii naleraq

UKA 2015/118-00

19.11.2015

Nuna tamakkerlugu pilersaarusiornermut nalunaarussiaq 2015.

Nuna tamakkerlugu pilersaarusiornermut nalunaarut Partii Naleqqamiit imannak oqaaseqarfigissuarput.

Nalunaarusiami aamma qujanartumik uppersaqqinneqarpoq, nunatsinni ilinniarsimasut amerliartornerat, taamaammat Partii Naleqqamiit naalakkersuisunut partiinullu tamanut, minnerunngitsumillu suliffeqarfinnut tamnut kaammattuutingaarput, ilinniarsimasortavut tamakkiinerusumik atorluarniaqqullugit.

Tassami uaniluunniit nalunaarusiami minnerpaamik, ilinniartortavut, pingaartumik lminnerpaamik inuiaqatigiilerinermut aningaasarsiornermullu tunngasunik qaffasissumik ilinniagallit atorneqarsimasariaqaraluartut Partii Naleqqamiit isumaqarpugut.

Taama ilinniarsimasortatsinnik annerusumik atorluanerunissamik kaammattuuteqareerluta, nuna tamakkerlugut pilersaarusiamut nassuiaat kiisami saqqummiunneqarmat Partii Naleqqamiit iluaraarput, tassami naluneqanngitsutut nalunaarusiarpassuit susassaqarfiit assigiinngitsut pillugit ukiut ingerlanerini saqqummiunneqartarput, minnerunngitsumillu aamma aningaasaqarnikkut ingerlatsineq pillugu nalunaarussiaq ukiut tamaasa saqqummiunneqartarluni.

Taamaattumik ataqatigiissaarluakkamik nuna tamakkerlugu pilersaarusiornissamut tunngavissaqarluarlutalu atortussanik naammattunik peqareerpugut.

Taamaammat-una aamma nalunaarusiarpassuit tamakku tamaasa atorluarniarlugit, minnerunngitsumillu qaffasissumik ilinniartortatta nuna tamakkerlugu pilersaarutit nangillugit suliarineqartarnissaannut atorluarneqarnerulernissaat Partii Naleqqamiit kaammattuutigipput.

Partii Naleqqamiit assut pingaartipparputk, nuna tamakkerlugu pilersaarusiornermut atattillugu inuiaqatigiinnii, aningaasarsiornikkut, inuussutissarsiornikkut, peqqissutsikkut, ilinniartitaanikkut,

isumaginninnikkut, inissaqarniarnikkut il.il. pillugit killiffitta tamakkiisuumik qulaajarneqarsimanissaat qulakkeersimassallugu.

Tassami pilersaarusiap suulluunniit aallartinnginnerani pisariaqarpoq siunertaq paasissallugu aamma pilersaarut sumut atussanerlugu, minnerunngitsumillu suut pilersaarusiornermi atussanerlugit.

Taakkunungalu tunngatillugu nuna tamakkerlugu ataqatigiissaarluakkamik pilersaarummut suliaqarnissamut nalunaarusiarpassuit qulaani eqqartukkavut tunngavissaalluarput.

Soorlu assersuutigalugu kalaallit nunatsinni innuttaasut peqqissusaat pillugu nalunaarusiaq “qanoq ippugut” –imi allaaserineqartut soqutiginarporpassuit oqaluttuarisaanitsinni aqqusaakkavut assigiingitsut pillugit nalunaarusiami takuneqarsinnaasut, pilersaarusiornermi aamma najoqqutaassaapput ajunngilluinnartut.

Kisianni aamma inuiaqatigiinniit malinnaalluaraanni arajutsineqarsinnaanngilaq, inuiaqatigiinni ineriartorrupt killiffii assigiinngitsut, soorlu nassuiaammi uani aamma eqqartorneqartut assigiinngitsut takutikkaat.

Uanili nassuiaammi ersarilluinnartumik nalunaarutigineqarpoq, pingaartumik kommunit Namminersorlutillu Oqartussaq akornanni pisortat suliassaqarfiini assigiinngitsuni ATAQATIGIISSAARINEQ amingaataasoq, pisariaqanngitsumillu tamanna inuiaqatigiinni ingerlatsinermut akitsorsaataasoq.

Minnerunngitsumik sanaartornermut tunngasut qanoq eqartigisumik piviusunngortinniarneqartarneri aaamma eqqarsaatigalugit.

Tassami assersuutigalugu Namminersorlutik Oqartussat sanaartugassaataat sinerissami kommunini suliarineqassappata, soorunami kommunalbestyrelsep nunaminertamik akuersisimanissaa avaqqunneqarsinnaanngilaq, tamaakkaluartoq qitiusumi pilersaarusiortut, pissutsit tamakku qarsupittarsimangaat nalunaarusiami oqaatigineqarpoq, tamannalu sulianut kinguarsaataaginnarani aamma akitsorsaataasartoq oqaatigineqarpoq. Tassa piffissaangallartillugu tamakku Namminersorlutik Oqartussaniit isumannaarneqartarnissaat pimoorunneqartarsimanngimmata.

Taamatut sulianik ataqatigiissaarisarsimannginnerup soorunami aamma sanasunut allanullu assassorluni suliaqartunut sunniuteqarnerluttarpoq.

Taamaammat Partii Naleqqamiit pingaartumik sanaartornermut tunngasut pillugit aningaasaliissutit marlunnut avinneqarnissaannik siunnersuut tusaatissatut tigullugu, sanaartugassanut aningaasaliissutit kommunit aqutassanngorlugit tunniunneqarnissaat kaammattuutingaarput.

Suliassaqarfiit assigiinngitsut akornanni kommunit Namminersorlutillu Oqartussat akornanni ataqatigiissaagaanerusumik pilersaarusiortualernissaannut Partii Naleqqamiit isumalluarpugut, kisianni soorunami kommunit aamma assigiinnginnerujussuat, aningaasaqarnikkut, inuussutissarsiornikkut, isumaginninnikkut il.il. pillugit pissutsit nalilersorluarneqartarnissaa Partii Naleqqamiit kaammattuutingaarput.

Tassami nassuiaammi uani aamma oqaatigineqarpoq, Qaasuitsup kommunia aamma kommune Kujalleq pilersaarusiornermi periusissiamik ukiaq manna suli naammassisaqarsimanngitsut, kisiannili naatsorsuutigineqartoq ukiap ingerlanerani periusissiaq taakku tusarniaassutigiumaaraat.

Kommunit sanaartugassanut ukumut tulliuuttumut pilersaarutaat, ukiut tamaasa marsi qaammat Namminersorlutik Oqartussanut nassiunneqartartut qiviraanni, tassani takuneqarsinnaavoq, Qaasuitsup kommunia aamma kommune Kujalleq sanaartornerup tungatigut, Sermersuup kommunianut aamma Qeqqata kommunianut sanilliullugit 100 mio-nilikkaanik appasinnerusunik pilersaaruteqartut.

Pissutsit taamaanerisa uppersarsiinnarpaat kommune Kujalliup aamma Qaasuitsup kommuniata aningaasaqarnikkut qanoq ilungersunartigisumik inissisimaneri.

Taamaammat sanaartorneq eqqarsaatigalugu kommune Kujalleq aamma Qaasuitsup kommunia immikkut isiginiarneqartariaqartut Partii Naleqqamiit kaammattuutingaarput.

Taamaattumik Qaasuitsup kommuniata aamma kommune Kujalliup sanaartornikkut, Qeqqata kommuniani, kommuneqarfik Sermersuumilu sanaartornikkut nalingiinnerusumik ingerlalernissaa naalakkersuinikkut qulakkeerneqartariaqartut Partii Naleqqamiit isumaqarpungut.

Taama Partii Naleqqamiit oqaaseqarluta nassuiaat tusaatissatut tiguarput.

Anthon Frederiksen